

欽定剿平粵匪方略

欽定剿平粵匪方略卷七十九 甲寅年

二月十二日 辛巳 崇綸青麐奏言探聞督臣吳文

鎔紮營堵城距黃州府二十五里正月十五日
黎明派署副將德亮等帶六成隊出戰先獲勝
仗另股賊匪從後抄截兵勇潰散午後該匪潛
來撲營當時存營之兵器械短少被賊縱火營
盤次第焚燒督臣自刎德亮陣亡等語又有報

稱督臣投水之說其餘將弁下落均未確知已
委員訪覓督臣等屍身及各官弁兵勇傷亡下
落再行辦理現在賊船因被城礮擊燬甚多斃
賊無算不敢渡江攻城俱匿於漢口小河之內
二十三日夜間大霧迷天遮蔽江面賊船乘此
潛往金口地方未知意欲何往該處係赴荊州
湖南之路防禦最關緊要德安現在無事台湧

應亟回荊州籌辦漢陽小河口尙有賊船一百餘號祇因船礮維艱兵勇不敷調遣未能卽時進剿臬司唐樹義礮船擅自開放金口聞該司因賊竄該處所募之勇逃散該司投水自盡經人撈救未知下落礮船諒被賊擄殊堪憤恨二十五日金口賊船二百餘隻又往上竄其漢口賊船百餘隻亦於次日晚間開往上游城礮連

環轟擊沈其數隻奏入

上命軍機大臣傳諭崇綸青麐曰現在金口漢口賊船均已連檣上駛武昌情形稍緩而荆襄一帶萬分喫緊自應先其所急酌撥兵勇前進與台湧聯絡聲威互相接應省城防兵六千餘名加以魁玉所帶官兵一千名爲數尙多不得藉口守城置上游於不顧著崇綸等迅速抽撥交魁玉帶往助剿仍一面密爲布

置扼其回竄武昌之路軍情變遷無定該撫等務當
權衡緩急統籌妥辦

上又命軍機大臣傳諭台灣曰崇綸青麀奏總督吳文
鎔兵敗捐軀漢口金口賊船上竄台灣現授爲湖廣
總督統轄全省自應移兵荆襄一帶力遏賊衝並隨
時知照略秉章曾國藩督飭兵勇合力夾擊荆襄爲
南北要隘斷不可令賊竄擾官文已授爲荊州將軍

與該督可以互相策應魁玉所帶駐防官兵由武昌上援或令防守荆郡或令隨營剿賊並著該督酌量調遣

上又命軍機大臣傳諭駱秉章曾國藩曰前因荆襄等處緊要諭令駱秉章選派精兵一二千名前往湖北交台湧調遣並諭曾國藩迅帶礮船順流直抵武漢會合剿辦茲據崇綸青麀奏金口賊船竄赴上游漢

口賊船亦陸續上竄已有旨授台灣爲湖廣總督令其統兵馳赴荆襄一帶剿賊並令崇綸等於省城防兵內分撥協剿湖北賊勢狡猾亟須遏其紛竄前調湖南之兵諒已起程仍著駱秉章於交界處所派兵嚴密設防如須出境協剿卽著嚴飭帶兵員弁隨同台灣協力剿擊會國藩統帶礮船想已開行著卽兼程馳赴下游迎頭截剿此時水路進攻專恃湖南礮

船過其兇殘務須趕緊前進勿稍延誤至礮船所需糧餉湖南江西各省如有款可籌自當就近提用著會國藩迅卽咨明各該撫酌量籌辦

上諭內閣曰據崇綸青麐奏稱吳文鎔紮營堵城督兵攻勦先獲勝仗旋因營盤被賊焚劫吳文鎔兵敗捐軀情形尙未確悉著台湧崇綸青麐再行確查其署副將德亮陣亡情形及臬司唐樹義現在下落著一

併查明具奏

同日英桂奏言臣查豫省壤地寬廣綜計額兵
僅一萬餘名散處十三州郡爲數本屬無多軍
興以來厯年徵調出省不下數千近因在防客
兵分別選汰本省抽撥實屬爲難故不得已飭
募餘丁以補額兵之不足卽鎮臣柏山駐紮固
始帶兵亦不及二千現在東南北三面受敵東

南兩面一州五郡與皖楚犬牙相錯水陸兼通
自安徽廬郡失守歸陳汝光等處民情已爲搖
動是以臣急移汝郡居中鎮撫追賊分踞六安
距固始僅百餘里距光州商城不及二百里人
心更覺惶惑鎮臣現帶官兵不多一經移撤赴
楚固始要隘空虛正屬可慮且舍近皖邊防攻
楚北羣醜道里較遠衆寡懸殊竊恐鄰省指臂

之效未收而本省腹心之憂滋甚況賊蹤靡定
聞已進泊襄江難保不窺伺北竄萬一荆襄有
警則南陽一帶喫重而我軍遠在楚漢運掉不
及尤覺可虞臣須通籌全局又未能偏守一隅
現北路賊匪未平河北彰衛二屬不能撤防省
城根本重地亦須留兵駐守歸陳兩郡密邇皖
氛土匪未靖防兵實覺太單不得不據實直陳

惟有仰懇

聖明鑒察俯准仍照前奏

飭下江南大營迅移精兵馳勦皖逆庶幾兵力厚集聲
威更壯奏入報

聞

同日

上命軍機大臣傳諭僧格林沁勝保曰逆匪竄踞東城

各村該處地方徧小積穀無多且聞賊匪所搭木壘
半用樹枝支架必不能十分堅固若不及早併力進
兵又將竄擾他處此時已屆二月中旬春融冰泮馬
隊難行勦辦更難得手著該大臣等嚴飭帶兵六員
一鼓作氣直搗賊巢如將弁中有不遵號令及一營
出隊他營不爲應援者卽著照軍法懲辦若僧格林
沁等各存意見不能會合進攻耽延時日朕亦惟執

法從事決不寬貸

十三日壬午僧格林沁勝保奏言查逆賊被困情

急乘初九日午刻大霧迷漫捨命由小禮文向

東南奔竄經善祿就近帶兵馳赴念祖橋截殺

該逆仍復堅拒我兵極力撲擊斃賊七八百名

賊屍徧地順隄由西南竄逸臣等乘夜追擊該

逆直前狂奔行至邊馬橋偏令鄉民用木搭橋

偷渡我兵隨追隨殺及至河邊賊已過河將橋
燒斷臣等趕緊繞至賊家橋催令搭橋渡河該
逆已竄入獻縣臣等先後趕到乘其喘息未定
極力攻擊該逆不敢踞城又向南門奔竄計復
斃賊數百名時已昏黑因兵馬連夜奔走百餘
里暫令少休臣僧格林沁先督馬隊追擊臣勝
保一面尾督馬隊繼進一面催調步隊接應總

期窮賊所向盡力殄除

僧格林沁勝保又奏言逆匪竄至獻縣經達洪
阿於西門迎擊斃賊一百餘名該逆退入城中
復由南門竄逸臣等督兵追及於善女橋前後
夾擊至富莊驛地方賊屍枕藉共斃賊一千餘
名生擒五十餘名該逆隨拒隨走到富莊驛村
內設伏抗拒我兵實難撲進現已飛調步隊官

兵一俟到齊卽合力燒圍

僧格林沁勝保又奏言查逃匪全股撲出副都統雙齡不能遏賊竄逸帶兵追擊亦無斬獲相應請

旨將副都統雙齡卽行革職以示懲儆

僧格林沁勝保又奏言查本月初十日前任副都統達洪阿督帶馬隊官兵在獻縣城外將該

逆隊伍衝斷擊斃逆匪一百餘名該員曾任二品大員臣等未便保奏可否量予

恩施出自

聖裁

同日桂良奏言本月初九日亥刻賊匪向東南西南竄逸臣當飭該地方文武加意嚴防復據勝保咨稱賊匪大股由小禮文撲竄該大臣已

親督官兵與僧格林沁分路抄截該匪究係竄
往何處一俟偵探明確卽行奏報均奏入

上命軍機大臣傳諭僧格林沁勝保曰逆匪竄踞東城
等村我兵圍攻已逾月乃本日據奏逆匪於初九
日乘霧由小禮文向東南奔竄復據桂良奏該逆向
東南西南竄逸是賊匪顯係分股潰竄正當乘其喘
息未定四面兜擊著僧格林沁勝保派撥精兵繞赴

賊前截擊其逆首各犯尤不可令其乘間免脫並飛咨張亮基於山東直隸交界地方嚴密堵截河橋爲賊燒斷我兵繞至賊家橋已屬落後以致賊得竄入獻縣現在僧格林沁業已先督馬隊追擊何以勝保僅督後隊繼進前次賊由獨流竄出經僧格林沁痛加剿洗勝保耽延數日始行趕到此次若復稍有遷延罪將誰諉刻下賊衆是否分股奔竄該大臣等是

否分路追擊各路帶兵大員如何兜截前後策應著
卽迅速具奏正在寄諭間復據奏稱逆匪由獻縣南
門竄出我兵追及該逆隨拒隨走至富莊驛村內設
伏等語富莊驛地方牆垣堅厚我兵俱係馬隊並無
槍礮行軍以火器爲最利現在軍營便捷礮位爲數
不少該大臣等旣跟蹤追勦並不帶槍礮以徒手擊
賊有是理乎至逆匪奔竄後占踞集鎮輒云礮火猛

烈不能撲進而我兵轉藉口於無槍無礮似此遷延
迂緩必致貽誤事機且前此逆匪初到東城該大臣
等卽以專待礮位爲詞此次又以無礮藉口其誰欺
乎若少事耽擱該逆又將築壘挖濠負嵎堅守或乘
隙奔突若不西竄卽南撲景州德州一帶皆係水陸
要隘我兵又成尾追之勢勦辦何日可了兵貴神速
豈可一誤再誤著僧格林沁勝保等迅就現到之兵

設法進攻並飛催後隊官兵星速前進不准片刻遲延若復藉槍礮未到以致老師糜餉又蹈東城故轍朕惟將該大臣等從重治罪

上諭內閣曰達洪阿帶兵殺賊奮勇可嘉著卽開復原官副都統雙齡不能遏賊竄逸帶兵追剿又無斬獲無能已極著卽革職留營帶罪自效

同日琦善奏言本月初五日總兵羅騰龍督隊

由西岸行至瓜州深入攻勦該逆數千人出拒
經官兵擊退殲賊無數詎意賊匪傾巢而出愈
聚愈多約有萬餘人分股繞襲我兵之後官兵
寡不敵衆瞿騰龍下馬步行揮刀力戰手刃黃
衣賊目數名左右泣勸其上馬突圍誓死不顧
衝入賊隊殺賊數十名旋即遇害臣查瞿騰龍
有膽有識謀勇兼優上年力扼三汊河以孱兵

當劇寇每戰身先士卒其忠勇不異雙來茲因
力戰被害身受多傷深堪憫惻又查有甘肅鎮
羌營遊擊王禮等均隨瞿騰龍陣亡其餘傷亡
弁兵容臣查明咨部辦理奏入

上命軍機大臣傳諭琦善曰據奏進剿瓜州連獲勝仗
總兵瞿騰龍深入遇害是連日雖獲勝仗豈能償此
挫失現在官兵數逾萬人水路廣艇各船亦不下數

十號著琦善督飭各路帶兵大員設法進剿稍贖前愆至統帶艇船之總兵葉常春等前因琦善奏稱呼應不靈難以調遣請嚴飭該總兵等緊扼瓜州斷賊接濟已降旨將葉常春等摘頂示懲如有不遵調度者卽行正法著琦善仍遵前旨嚴飭軍營將弁兵勇水陸夾擊迅將瓜州逆匪盡數殄滅毋誤事機

上諭內閣曰總兵瞿騰龍由行伍洊升專闕屢立戰功

茲因攻勦深入奮勇殺賊身受重傷爲國捐軀殊堪
憫惜著加恩追贈提督卽照提督陣亡例賜卹任內
一切處分悉予開復應得卹典該衙門察例具奏伊
子瞿輔廷瞿廣善瞿廷熊瞿廷豹均著賞給守備其
隨同打仗陣亡之甘肅鎮羌營遊擊王禮山東卽墨
營守備崔萬鎰鎮筸營千總詹榮純漢中鎮千總楊
兆熊河州鎮千總黎玫延綏鎮千總武孝署千總雲

騎尉張秀把總李源白生蘭李永和劉慶祥外委金
有貴額外外委王文德黃和春火器營護軍校武奎
著一併交部議卹

同日湖廣總督台湧奏言查現在偏近德安各
路賊匪雖已被剿退竄難保不窺伺北向之路
臣已飭董玉龍帶所收集之兵仍由東路孝感
縣之三汊鋪前進吳登鼈等帶所收集之兵仍

由中路長江埠一帶前進復派成福帶所收集之兵由西路應城縣前進均飭步步相機搜捕竄匪次第偪赴漢陽漢口後路堵紮旣圖應援省城亦可藉遏北竄至應山縣之武勝關一帶實爲入豫咽喉防範尤關緊要臣前調之提標各營官兵五百名現已陸續催齊一面飭都司葉永泰統帶馳赴該處聯絡河南派防官兵扼

要布置貴州提臣佈克慎由麻城收集貴州各營潰兵來至德安自願奮力勦賊臣已商令前往孝感縣屬之湯店堵紮就近督飭董玉龍等相機進剿

同日青慶奏言逆匪在漢口漢陽一帶築有土城三處礮臺數處不但伊得犄角之勢且我處道路梗塞非重兵由背攻擊萬不能散是以臣

函催將軍台湧星夜帶兵前進又探得曾國藩
行距金口百餘里胡林翼已有函來二十二日
到省不料被唐樹義所帶礮船各勇在前恐嚇
大約退守上游臣卽將賊勢已敗正在窮蹙思
竄等情詳晰函致令其速進唐樹義所帶礮船
已被該逆搶去一半尤爲可慮又探得黃州府
城業已退出近日並無上竄之船惟恐廬州賊

集賢堂
匪被勦紛竄臣與撫臣飛咨江西巡撫令其速
撥重兵在九江兩岸扼守以截來路又飛咨湖
南巡撫等豫爲嚴防惟臣係無權之官雖經密
爲布置而人未必信不得不豫爲陳明

青麀又奏言查湖北通數省之關津即使金陵
收復餘黨必竄湖北廬州收復亦然各逆起於
廣西聯以廣東夥以兩湖追捕窮蹙非由湖北

不能歸巢若不令其歸巢非湖北有重兵不可
且湖北不守則金陵一帶餘黨竄回將來仍是
不了之局惟有仰懇

聖恩北路一經凱撤卽飭勝保前來湖北再撥大兵分
赴安徽廬州江西九江處處截攻果能布置合
宜賊衆當不難殄滅至北路必須仍留重兵防
守金陵一股但使向榮實力勦辦自易克復或

俟廬州湖北一律肅清後再令勝保統兵會剿
金陵彼時湖北亦必須留兵扼守非如此辦法
斷不免於分竄

同日曾國藩奏言臣於正月二十八日自衡起
程湘潭分造之船尙未盡畢臣到潭晝夜督辦
到長沙時支運軍械鉛藥守催數日卽行馳赴
下游臣所辦之船拖罟一號快蟹四十號長龍

五十號三板艇一百五十號又改造釣鉤船一百二十號雇載輜重船一百餘號所配之礮借用廣西者一百五十位廣東購辦者去年解到八十位今年解到二百四十位本省提用者一百餘位所募之勇陸路五千餘人水師五千陸路各營編列字號五百人爲大營不滿五百者爲小營水路分爲十營前後左右中爲五正營

正營之外又分五副營統計全軍約一萬七千人至臣前摺稱待張敬修解礮到楚乃可起行頃知張敬修爲粵奏留不能赴楚續購之礮亦不能遽到下游賊勢急於星火臣更不可少延矣均奏入

上命軍機大臣傳諭台湧曰昨已有旨令台湧移兵荆襄一帶力遏賊衝當此逆勢狻獪該督必當統籌全

局妥爲布置惟兵力尙覺單弱本日據曾國藩奏已於正月二十八日督帶礮船自衡州起程統計全軍約一萬七千餘人此時水路進剿賴有此一軍應援曾國藩一人統領重兵朕心實深懸繫台灣統轄兩省責無旁貸所有湖南礮船應如何調撥布置之處著該督與該侍郎和衷籌畫現在魁玉已帶兵由武昌上援自可酌量調度佈克慎現由麻城帶兵到營

著卽飭令該革員前往曾國藩水營隨同管帶礮船
稍贖前愆董玉龍等分路進剿該督務須嚴飭該員
等迅速前進毋得稍涉遷延

上又命軍機大臣傳諭青麀曰現在賊船全行上竄已
有旨令台湧督兵進剿並諭曾國藩速帶礮船前來
應援該學政係奉旨籌辦防堵大員一切應辦事宜
自可會同巡撫熟籌妥辦遇有調遣之處地方文武

何至呼應不靈乃該學政屢次奏報總以無權之官人未輕信爲詞殊不可解武昌省城內防禦緊要著與崇綸嚴密布置毋得各存意見

上又命軍機大臣傳諭曾國藩曰楚北賊勢猖獗連艘上竄曾國藩現已由衡州進發所帶戰船礮位均經配搭齊備務卽起期駛赴下游惟員弁丁勇一萬七千餘人係派何人分起管帶已有旨令台灣飛飭已

革提督佈克慎前往幫帶兵勇矣本日據青麐奏探聞會國藩帶勇已距金口百有餘里貴州道胡林翼隨同前來現復退往上游該侍郎礮船早入楚北胡林翼何以退守著會國藩飭知該道迅速前進應如何相機攻剿之處著隨時知照台湧務期水陸聲息聯絡合力剿辦

十四日
癸未
工部右侍郎載齡奏言據探逆匪盤

踞束城村地方經僧格林沁等於東西北三面
紮營特留南面誘其敗逃並於南面距賊壘較
遠地方挑壕設伏又將附近村莊飭令騰空該
逆匪果於初九日夜乘霧潛逃被伏兵擊回竄
至河間府被鄉勇擊退現在河間府迤北二十
里堡盤踞我兵陸續追至紮營進剿奏入

上命軍機大臣傳諭載齡曰昨據僧格林沁等奏逆匪

全股竄出官兵追至富莊驛桂良奏稱有賊由東南西南紛竄之語富莊驛係在河間東南其西南一帶何處有賊分竄亦未確指現在逆匪亡命狂奔後路之防尤關緊要著載齡卽飭各路弁兵分投確探隨時速奏其固安東安黃村涿州通州蘆溝橋等處防堵各營仍著嚴飭各該帶兵員弁加意嚴防不得因逆氛漸遠稍存大意

上又命軍機大臣傳諭僧格林沁勝保曰昨據桂良奏
有賊向東南西南紛竄之語本日據載齡奏稱逆匪
現在河間府屬迤北二十里堡盤踞富莊驛在河間
府城以南二十里堡在河間府城以北相距一百數
十里其間必有分竄之處究竟該逆是否全聚富莊
驛村內抑另有零匪潛匿附近村莊東城等村是否
尙有餘賊著該大臣等迅速據實具奏務須分投確

探四面搜勦方能盡殲醜類現在大兵盡力南趨儻
北面尙留餘孽致令再有裏脅衝突情事豈非顧此
失彼著僧格林沁勝保嚴飭各路帶兵大員迅掃賊
氛斷不准藉口於無礙無槍耽延時日

同日台湧奏言查湖北全省官兵早已徵調一
空更無可調之處所恃者祇此收集潰兵爲數
不及二千銳氣皆失以之勦除小股竄匪尙屬

可用而欲驅其直搗漢陽未見其可曾國藩所
帶舟師猶無抵北信息唐樹義所領礮船前已
駛上金口旋經省城調回二十二隻餘船均爲
賊奪並有唐樹義陣亡之說四川松潘建昌兩
鎮官兵未聞來楚且湖南四川兩路兵來均必
由大江以南進剿目下賊氛中阻實恐緩不濟
急臣於未奉

諭旨之先收集黃州大營潰兵派分三路前進飭其前
赴漢陽漢口後路堵紮而將新調提標官兵五
百名派赴武勝關與河南派防之官兵聯絡布
置卽以嚴防北竄者爲前三路之後應臣一面
催令松潘建昌官兵前來一面飛咨湖南撫臣
駱秉章迅速撥兵趕緊東征至荆襄等處均隨
時諄飭各該文武實力防範並咨會河南撫臣

英桂聯絡聲勢其漢陽漢口盤踞賊匪逆猷正
張非俟兵力稍厚未可貿然攻勦堵城之敗覆
轍可鑒查該處距黃州府城二十五里濱江臨
壑三面皆水大營十一座排比屯紮已犯兵家
之忌而吳文鎔滅賊心急催戰甚嚴正月十五
日進勦出隊六成之多未能防賊抄襲致中詭
計吳文鎔臨陣捐軀並無避至靈沙河之事現

據應城縣知縣翁吉士稟稱吳文鎔屍身已在
堵城覓獲此外文武尙未詳查 臣外審賊情內
度兵力不能不量敵後進未便稍涉鹵莽

同日駱秉章奏言據貴州委員黃鳳稟稱正月
二十三日粵匪上竄金口臬司唐樹義督帶水
勇開礮擊沈賊船十餘隻斃賊無數並砍斃紅
衣賊目二名繼因衆寡不敵船被擊破該臬司

落江身死查漢口上通荆襄爲南北往來要地
又與湖南岳常澧等府州屬路路可通而岳州
爲湖南門戶雖已派有兵勇在彼堵禦究恐兵
力單薄查曾國藩於正月二十八日自衡起程
赴鄂須由岳州經過臣已咨商曾國藩先撥兵
勇數千趕赴岳州一帶迎擊以勦爲堵並請

飭下四川河南督撫臣一體迅撥兵勇合力堵剿防其

北竄再湖北臬司唐樹義帶勇勦賊落水身死
殊堪矜憫相應請

旨從優賜卹均奏入

上諭內閣曰湖廣總督吳文鎔歷任封圻均能盡心職
守自調任湖廣卽值逆匪復擾武昌漢陽當經督率
官兵擊退迨該逆竄聚黃州吳文鎔出省迎勦先經
獲有勝仗正月十五日以力攻堵城中賊詭計連營

被燒遂致陣亡據台湧奏該督滅賊心急催戰甚嚴
因而失事吳文鎔此次督兵失利本屬罪有應得念
其臨陣捐軀不虧大節著照總督陣亡例從優賜卹
任內一切處分悉予開復應得卹典該衙門察例具
奏湖北臬司唐樹義督帶水勇礮船趕赴金口被賊
將船隻擊破落水身死亦堪憫惻著加恩開復革職
處分照臬司例賜卹

同日崇綸青麐奏言查臣等前調荊州滿兵一千二百名到省者僅八百名現在賊臨城下若專務防守任其猖獗恐愈聚愈多尤難抵禦並聞黃州尙有賊匪船隻各處擄搶土匪因之竊發不得已飛咨將軍台湧酌撥精兵二千會同夾擊而驛路不通遞往德安尙須繞道湖南紆遠數千餘里何能卽到曾國藩之戰船聞正月

杪可以起程廣東所解洋礮並弁兵人等均被
截留貴州候補道胡林翼帶勇千餘名來楚聞
已入境現所恃者惟此三處援兵未定能否速
至臣等已飛咨催促以資接應

崇綸青麀又奏言查江西製造戰船諒已就緒
該省適當其中若能多派將弁於大江扼要處
所截賊往來之路不獨江西可保無虞且使皖

楚竄匪首尾不能相顧辦理較易得手伏乞

飭下撫臣張芾妥速辦理奏入

上命軍機六臣傳諭陳啟邁陸元烺曰自逆匪竄擾以來長江數千里任賊往來游駛現在金陵未克廬州復陷而同竄武昌之賊紛紛駛赴漢陽金口一帶逆蹤剽忽非亟籌肅清江面不能奏功曾國藩由湖南統帶舟師順流迎擊業於正月二十八日起程計期

應抵楚北上年八月間張芾有飭令夏廷樞修造船
筏之奏此項戰船爲數若干停泊何處卽著陳啟邁
飭知陸元烺揀派諳習軍務及熟悉水師得力員弁
配齊軍火礮位星速管帶駛出九江擇扼要之區截
賊往來之路與曾國藩聲勢聯絡上下夾擊非但遏
賊分竄南昌且使皖楚紛擾之賊首尾不能相顧該
撫等惟當妥速籌辦不准遷延迂緩

同日福濟和春奏言查逆匪占踞廬州業已月
餘臣和春督率官兵更番前進初四日移營三
里岡該逆往來窺伺均經官兵追擊斃賊十餘
名初六日卯刻逆匪分五路來撲每路約二千
人臣和春同已革副將鄭魁士率同官兵由中
路迎擊適四路賊匪分撲總兵吉順副都統薩
炳阿知州江忠濬總兵全玉貴等營盤俱經各

鎮將奮力攻擊斃賊多名嗣中路之賊紛紛敗走又經鄭魁士帶兵追勦擒斬甚多惟時分撲各營之賊均被我兵出營追至河邊落水死者不計其數此次之戰自卯至巳約斃賊匪一千數百名實緣湖南官兵久於戰陣勇敢得力雖爲數不多竟能使新到之兵齊力用命深堪嘉獎奏入

上嘉之

福濟和春又奏言查總兵珠克登音德布楊青
鶴等雖督兵打仗不致畏縮然俱未久歷行間
必須屢經戰陣勇敢可靠之員酌帶親信官兵
爲之統領始足以資得力臣和春前奉

諭旨飭令向榮卽派總兵秦定三趕緊帶兵來廬會剿
迄今尙未見到一俟該總兵秦定三來廬卽行

相機會剿

福濟和春又奏言查正陽關係壽州所屬近接
潁州與河南毗連前因廬州失守皖省兵力過
單飛咨河南趕緊堵禦嗣聞逆匪竄踞六安已
派山東官兵一千二百名飭參將劉玉豹馳往
防剿計已行抵壽州昨袁甲三以正陽關防堵
喫緊奏奉

諭旨飭令河南嚴加堵禦如能先事防守諒不致再有
竄入

福濟和春又奏言查巢縣爲廬州後路必須趕
緊派撥官兵前往勦捕查有副都統忠泰幹練
老成當派仁勇一千名徐州官兵八百名交其
管帶連原帶馬隊二百五十名馳往巢縣進勦
並查有在籍編修李鴻章熟悉該處情形已令

聞

前往會同相機勦辦奏入均報

十五日

甲申

青麐奏言查賊船在江面游弋無定

漢口漢陽河內眞賊不足二千惟守城兵勇斷
不能分又無船隻可渡祇有德安府距省尙近
將軍台湧如可統兵由背進攻不難勦滅不料
撫臣已咨催將軍前赴荊州設防不知荊州雖

屬緊要省城先已被圍況省城能合兵攻勦則
荊州自可安如泰山將軍台湧如可帶兵前來
將漢口之路打通武昌尙可保守否則何堪設
想漢口爲湖北第一要隘何以該撫以漢陽爲
外府現賊船踞武昌上游六十里金口地方二
三百隻又踞武昌下游九十里青山陽邏地方
數十隻踞武昌對岸漢口漢陽二三百隻大江

一帶賊已占踞二百餘里臣係學政本無守土之責又無調兵之權所有地方文武如何能聽調度即使臣能撫馭得宜而隻手空談亦屬萬難布置況事關重大倉猝之間臣之材力本有不及者乎臣勢處危急不能不竭盡血誠力陳中外粉飾之弊惟冀

聖明加察

青麐又奏言頃聞岳州府賊船二百餘隻將黃
州至岳州東西江面占踞而武昌省城界在江
之南岸通省各府州縣均在江之北岸呼吸不
通各府州縣亦無設法前來送信者將軍台湧
亦無音信大約各處總以道路梗塞爲辭省城
對岸卽是漢口漢陽賊若久踞兩處較之金陵
尤甚何也金陵尚有數省可以合兵前進武昌

無處可通文報困守旣難久待若被攻撲又將
何以禦敵惟有懇

恩飭下四川陝西河南各督撫調撥精兵交堪勝統兵
之大員管帶來鄂以資剿辦奏入

上命軍機大臣傳諭崇綸青麐曰現在賊船陸續上竄
荊州情形亦甚喫重而孝感應山等處皆有賊匪肆
擾賊船盤踞江面台湧所帶官兵無多豈能飛渡竟

置北岸於不顧省城防兵共有六千江面礮船亦尙有二十餘隻昨據崇綸青麐奏報攻勦情形尙云擊沈賊船多隻而青麐則總稱地利人心兩不足恃且崇綸奏報均與青麐聯銜而青麐則單銜具奏並云崇綸不及會銜豈有同在一城防守竟至隔閤如是值此危急之時兩人各存意見必致誤事該學政昧於事機不知輕重該撫復一籌莫展徒事牴牾豈江

北各府皆非該撫等所轄耶至摺內所陳明言賊在漢陽陸續上竄忽又言武昌被圍旣言曾國藩於正月杪可以起程而青麀正月二十八日所發之報又稱曾國藩已距金口不遠其偵探不確已可概見崇綸前次請飭吳文鎔出省勦賊逮朕嚴諭吳文鎔前赴黃州該撫又稱省城緊要請令暫留似此毫無定見卽知省城布置亦未必確有把握現在台湧已授

爲湖廣總督亟應先將江北逆匪剿除以杜北竄該撫等但當協力和衷固守城垣不得徒以無可籌辦藉詞爲他日卸罪地步總之德安一帶賊匪盡除則漢口逆匪自不敢徑攻武昌朕於軍情緩急慎重權衡並非重北輕南不爲湖北省垣計也

上又命軍機大臣傳諭裕瑞曰連日疊據台湧崇綸青麇奏賊船由武昌漢陽上竄金口荆襄情形喫重亟

待應援等語現在台湧嚴扼北路恐該匪沿江上竄
勦辦愈難著裕瑞飛飭雙保福忻迅卽帶兵前進迎
頭截擊一面知會台湧應向何路分派援應相機妥
辦並著裕瑞派員確探楚境賊情如應添兵接應卽
著於各路防兵內酌量緩急調撥前往攻勦無得株
守一隅仍嚴飭界連楚省文武隨時嚴密防範無任
匪蹤闖入

上又命軍機大臣傳諭王慶雲桂明曰賊船回竄武昌
駛擾漢陽金口一帶曾國藩統帶船礮水勇馳赴下
游迎擊惟賊蹤剽急尤應防其乘虛分竄所有陝省
界連湖北之商雒一帶均須一體設防扼要堵剿桂
明現駐潼關著卽嚴飭帶兵員弁實力巡防隨時與
楚省知照聯絡聲勢互爲應援並著王慶雲督飭各
該地方文武嚴防邊境勿稍疏失

同日向榮彭玉雯奏言查大營自分兵赴廬後
續因撫臣許乃釗以上海攻勦緊要又撥去黔
楚各兵共一千名兵力更形單薄且該逆屢次
窺伺蘇常處處派防並隨時迅圖進攻委難再
將各兵抽撥日來句容之龍潭太平之黃池均
有賊船分擾紛紛請援均應籌兵分投堵剿伏
查臣軍共撥過北路兵五千名並調赴鎮江上

海東壩各處堵剿官兵七千餘名總兵秦定三
本難再令前往然

聖諭諄諄臣不敢瀆請再留已札飭該總兵卽日馳赴

廬州會剿前因琦善進軍瓜州臣已飭鎮江水

師營船乘機會剿並飭已革總兵李德麟來營
面授機宜一面咨會琦善就近調遣果能水陸
會合攻擊卽可乘風駛泊上游一帶扼堵江面

斷賊往來則瓜州鎮江可期次第克復矣

同日張亮基奏言據探逆賊由東城竄出南奔
獻縣大兵在後追擊該逆疾趨而南臣駐防德
州邊隘距逆氛漸近機有可乘卽日統帶在德
官兵練勇馳赴景州迤北迎頭邀擊與大兵南
北夾攻臣北行後恐德州後路空虛且距西路
東昌臨清等處稍遠鞭長莫及查東路之武定

府屬不甚喫重應將現駐樂陵縣之青州滿兵
陽信縣之登標兵飭調來德交督糧道姚錫華
就近統帶以爲西北兩路聲援均奏入報